



NEWSLETTER BR. 57

JANUAR 2021

FIPA AKTIVNOSTI ≡ SADRŽAJ

- » DIREKTORICA AGENCIJE FIPA MILICA MARKOVIĆ NA SASTANKU U AMBASADI BOSNE I HERCEGOVINE I PREDSTAVNIŠTVU REPUBLIKE SRPSKE U BEOGRADU
- » DIREKTOR FIPA-E MILICA MARKOVIĆ RAZGOVARALA SA DIREKTOROM RAZVOJNE AGENCIJE SRBIJE
- » DIREKTORICA FIPA-E MILICA MARKOVIĆ NA SASTANKU SA DIREKTOROM KOMPANIJE ZA VANJSKA INVESTIRANJA DRŽAVE LIBIJA (LAFICO)
- » POSJETA FIRMI WURTH DOO HADZICI/SARAJEVO
- » AFTERCARE POSJETA FIRMI SOFTHOUSE BALKANS DOO SARAJEVO
- » POSJETA FIRMI BUROJ INTERNATIONAL GROUP D.O.O SARAJEVO
- » DIREKTOR FIPA-E MILICA MARKOVIĆ RAZGOVARALA S OTPRAVNIKOM POSLOVA AMBASADE LIBIJE U BIH

FIPA POSLOVNE VIJESTI ≡

- » ADRIATIC METALS PLC DOBIO RJEŠENJE ZA EKSPLOATACIJU RUDE U VAREŠU
- » NJEMAČKA KOMPANIJA INVESTIRA U GORAŽDE, POSAO ZA 150 RADNIKA
- » TURSKI INVESTITOR U ŽIVINICAMA ŽELI GRADITI FABRIKU NAMJENSKE INDUSTRIJE OD 70 MILIONA KM
- » INVESTICIJE U DOBA PANDEMIJE: 50% KOMPANIJA NASTAVILO PLANIRANA ULAGANJA U BIH
- » PRIVREMENO SMANJENJE CARINSKIH STOPA KOD UVOZA REPROMATERIJALA



≡ IZDVOJENO

≡ USAID PREDSTAVIO PROJEKT RAZVOJA ODRŽIVOG TURIZMA

Američka agencija za međunarodni razvoj (USAID) pokrenula je novi petogodišnji projekt razvoja održivog turizma u Bosni i Hercegovini, vrijedan 20 miliona američkih dolara, koji će zemlju pripremiti za put prema turističkoj destinaciji svjetske klase u postpandemijskom dobu.

USAID-ov Razvoj održivog turizma u Bosni i Hercegovini (USAID Turizam) pomoći će jačanju ekonomije kroz unapređenje poslovnog okruženja, jačanje kvaliteta turističkih usluga, povećanje pristupa finansiranju za turistički sektor, te snažnijem marketingu zemlje prema međunarodnim turističkim tržištima. USAID Turizam bit će implementiran u partnerstvu s Ministarstvom vanjske trgovine i ekonomskih odnosa Bosne i Hercegovine, Ministarstvom okoliša i turizma Federacije Bosne i Hercegovine, te Ministarstvom trgovine i turizma Republike Srpske.



≡ IZDATA BROŠURA ZA INVESTIRANJE U SEKTOR MINERALNIH SIROVINA BIH

Rudarski institut d.d. Tuzla, u svojstvu projektnog partnera sudjeluje u realizaciji međunarodnog projekta pod nazivom "Multifaktorski model za investicije u sektoru mineralnih sirovina", finansiranog od strane EIT-a (Evropskog instituta za inovacije i tehnologiju) kroz program KIC Raw Materials.

Projekat se realizuje pod rukovodstvom RGNF-a Univerziteta u Zagrebu, uz učešće pet partnerskih institucija iz BiH (Rudarski institut d.d. Tuzla, Institut Kemal Kapetanović Univerziteta u Zenici, Rudarski institut Banja Luka, Rudarski institut Prijedor, Institut za urbanizam, građevinarstvo i ekologiju Republike Srpske) i potpomognut od strane Montanuniversitat Leoben (Austrija), Geološkog zavoda Slovenije i Cemex-a Hrvatska kao industrijskog partnera.

Tokom 2019. godine, konzorcij evropskog projekta "InvestRM" u saradnji s Agencijom za unapređenje stranih investicija u BiH (FIPA) izradio je promotivnu brošuru namijenjenu promociji najperspektivnijih ležišta antimonita, boksita, fluorita i magnezita u Bosni i Hercegovini za strane ulagače. Brošura je rezultat dvogodišnjeg rada projektnog konzorcija na razvoju aplikacije koja na jednom mjestu okuplja provjerene i relevantne informacije o 120 ležišta i pojava kritičnih mineralnih sirovina u Bosni i Hercegovini, ali i strukturirane ekonomske, pravne i socijalne podatke prema entitetima.

Najperspektivnijih 14 ležišta uvršteno je u brošuru koja je besplatno dostupna za download na službenoj stranici projekta. Brošura će biti promovisana putem agencija u Bosni i Hercegovini, na nacionalnim Informativnim danima te putem registra za mineralne sirovine Zapadnog Balkana.

Krajnji je cilj da brošura dođe do zainteresovanih ulagača u Zapadnoj Evropi koji nemaju prilike dobiti ažurirane podatke o kompleksnoj strukturi Bosne i Hercegovine na jednom mjestu.

Ispred RGNF-a Zagreb, na projektu sudjeluju izv.prof.dr.sc. Sibila Borojević-Šoštarić kao voditeljica projekta i doc.dr.sc. Vječislav Bohanek, dok su ispred Rudarskog instituta d.d. Tuzla kao projektnog partnera na projektu angažovani mr.sc. Eldar Jašarević, dipl.inž.geol. i Nermin Taletović, MA-inž.geol.

InvestRM aplikaciji možete pristupiti putem linka: <https://investrm.eu/app-tb/>

FIPA AKTIVNOSTI ≡

≡ DIREKTORICA AGENCIJE FIPA MILICA MARKOVIĆ NA SASTANKU U ≡ AMBASADI BOSNE I HERCEGOVINE I PREDSTAVNIŠTVU REPUBLIKE SRPSKE U BEOGRADU

-DOGOVORENA SARADNJA ZA ORGANIZACIJU POSLOVNIH FORUMA I DODATNO PRIVLAČENJE
INVESTICIJA IZ SRBIJE

Milica Marković, direktorica Agencije FIPA održala je sastanak s Nj.E. ambasadoricom BiH u Srbiji mr.sci. Aidom Smajić kako bi razmijenile informacije o trenutnim ekonomskim kretanjima i stanju u privredi Srbije i Bosne i Hercegovine, te mogućnosti saradnje na dodatnim ulaganjima srbijanskih kompanija u BiH.

Direktorica Marković se sastala sa šefom Predstavništva Republike Srpske u Beogradu gđinom Mladenom Cicovićem kako bi razgovarali o organizaciji poslovnih susreta i promocije mogućnosti ulaganja i investicijskih projekata u vlasništvu bh kompanija. Konstatovano je da svaka saradnja i investicije u Republiku Srpsku su i podsticaj bh. ekonomiji. Gđin Cicović je pozdravio inicijativu direktorice Marković za organizaciju sastanka i zajedničke saradnje.

Republika Srbija je treći po veličini investitor u BiH, sa iznosom od 1,998 miliona KM ili 1,022 miliona EUR do decembra 2019. Najveća investicija iz Srbije je bila kupovina Telekomunikacija RS ad Banja Luka, kao i ulaganja Komercijalne banke ad Beograd, Naftne industrije Srbije, Hemofarma ad Vršac, Swisssiona Takovo, Imleka ad, te kompanije Galames Beograd i mnoge druge investicije u energetski sektor, proizvodnju hrane, IT, turistički, metalo-prerađivački i tekstilni sektor.

I pored činjenice da u BiH djeluje preko 700 kompanija sa kapitalom iz Republike Srbije, konstatovano je da postoji interes za investicijske prilike u Bosni i Hercegovini. Iz tog razloga direktorica Marković je inicirala i predložila zajedničku organizaciju poslovnih susreta vlasnika projekata i kompanija iz BiH i kompanija iz Srbije.

FIPA u svojoj bazi ima više od 400 projekata domaćih kompanija, lokalnih zajednica i entiteta.

Gđin Cicović smatra da poseban fokus treba staviti na srbijanske kompanije koje izvoze u BiH i kako bi one trebale otvarati proizvodne pogone u Republici Srpskoj.





DIREKTOR FIPA-E MILICA MARKOVIĆ RAZGOVARALA SA DIREKTOROM RAZVOJNE AGENCIJE SRBIJE TN BOSNIA KONJIC ZAPOŠLJAVA OKO 150 RADNIKA, TE SE OČEKUJE POVEĆANJE PROIZVODNJE U NAREDNOJ GODINI.

-DOGOVORENO POTPISIVANJE MEMORANDUMA O SARADNJI I ZAJEDNIČKE AKTIVNOSTI NA REGIONALNOJ PROMOCIJI I PRIVLAČENJU INVESTICIJA IZ SRBIJE U BOSNU I HERCEGOVINU

Direktor FIPA-e Milica Marković je 26.januara 2021.godine u Beogradu održala sastanak sa direktorom Razvojne agencije Srbije (RAS) gđinom Radošem Gazdićem.

RAS je vladina organizacija koja nudi širok spektar usluga, uključujući podršku direktnim ulaganjima, podsticaj konkurentnosti i promociju izvoza, kao i sprovođenje projekata koji imaju za cilj poboljšanje ekonomskog ugleda Srbije.

Gđa. Marković je predstavila aktivnosti na kojima je FIPA angažovana s ciljem predstavljanja investicijskih potencijala BiH. Tom prilikom je inicirala zajedničke aktivnosti koje se odnose na promociju regiona, te dodatna privlačenja ulaganja iz Srbije u BiH, koja je trenutno treća zemlja investitor u BiH.

Marković i Gazdić su dogovorili zaključivanje Memoranduma o razumijevanju između FIPA-e i RAS-a, nakon što ga odobri Predsjedništvo BiH.

Takođe je razgovarano o planovima Američkog investicijskog fonda DFC koji je otvorio kancelariju u Beogradu krajem prošle godine iz koje će pokrivati i Bosnu i Hercegovinu i region i njihovoj kreditnoj i garantnoj shemi i proizvodima za kompanije.

FIPA će uskoro organizovati i sastanak sa direktorom kancelarije DFC-a u Beogradu kako bi razgovarali o planovima za BiH, ponudi za bh. kompanije i privlačenju ulaganja iz SAD-a.





DIREKTORICA FIPA-E MILICA MARKOVIĆ NA SASTANKU SA DIREKTOROM KOMPA NIJE ZA VANJSKA INVESTIRANJA

- DOGOVORENA ULAGANJA U BOSNU I HERCEGOVINU


Direktorica FIPA-e Milica Marković održala sastanak sa generalnim menadžerom LAFICO-a gđinom HNESH SALEM M O i njegovim saradnicima.

LAFICO je u potpunom vlasništvu libijske države i osnovani su sa ciljem investiranja širom svijeta, a do sada su investirali u širok raspon kompanija, uključujući najveće evropske industrijske kompanije, banke, fudbalske klubove, aluminijske gigante, medije, automobilske proizvođače, telekomunikacije, hotele i nekretnine, rudnike itd.

Direktorica Marković je upoznala predstavnike delegacije iz Libije sa prilikama koje nudi Bosna i Hercegovina, atraktivnim sektorima i projektima za ulaganje, nadležnostima različitih nivoa vlasti i uslugama koje FIPA nudi.

U toku sastanka generalni menadžer LAFICO-a je posebno istakao da je Libija opredjeljena za ulaganje u Bosnu i Hercegovinu i da vjeruje da ce u narednih nekoliko godina Libija biti među zemljama-najvećim investitorima u BiH. Direktorica Marković je pozdravila spremnost Libijske državne kompanije LAFICO da ulaže u Bosnu i Hercegovinu. Dogovoren je nastavka saradnje sa FIPA-om koja će pružiti daljnu podršku u realizaciji projekata za koje Libija pokaže interes.





POSJETA FIRMI WURTH DOO HADZICI/SARAJEVO

U okviru Saradničke mreže, kao dijela programa postinvesticione podrške investitorima u BiH, predstavnici Agencije za promociju stranih investicija (FIPA), Ministarstva privrede Kantona Sarajevo i Općine Hadžići, posjetili su kompaniju Wurth BH d.o.o., društvo za montažnu opremu i razmijenili iskustva i znanja u vezi sa poslovanjem kompanije i identifikacijom i rješavanjem otvorenih pitanja investitora radi poticanja rasta i razvoja kompanija u BiH.

Direktor firme gđin Adnan Topčagić i direktorica finansija i računovodstva, Armina Sakoč, iznijeli su trenutnu situaciju u vezi s poslovanjem kompanije Wurth BH d.o.o., planovima za naredni period, posebno u pogledu proširenja kapaciteta, novih ulaganja i novih zapošljavanja, te istaknuli da postoji mogućnost za unapređenje i razvoj, posebno ukoliko bi došlo do većeg razumijevanja vlasti za stvarne probleme privrednika te veće podrške privrednim subjektima ponajprije u stvaranju jednostavnijeg, transparentnijeg i savremenijeg poslovnog okruženja.

Posebno su istakli potrebu da svi nivoi vlasti rade na stvaranju jednake poslovne klime za sve poslovne subjekte, pravne sigurnosti i vladavine prava kao temeljnog nastojanja demokratskog društva koja po definiciji podrazumijeva: da pravo bude općenito, svima dostupno, da ne djeluje unatrag, da bude razumljivo, konzistentno, stabilno, da ga je moguće implementirati te da ga je moguće slijediti, i to vide kao najbolji način privlačenja kvalitetnih stranih investitora.

Wurth BH d.o.o. posluje od 1997. godine u Bosni i Hercegovini. Kompanija je bila smještena na više lokacija da bi 2007. godine izgradili vlastiti objekat u Binježu, općina Hadžići. Od tada su kontinuirano rasli te vremenom postali izabrani partner više od 20.000 profesionalaca u svijetu obrta i industrije u Bosni i Hercegovini. Sa svojim logističkim centrom u Sarajevu, regionalnim centrima i prodajnim predstavnicima širom Bosne i Hercegovine, Wurth BH d.o.o. nastoji biti u neposrednoj blizini i na usluzi svojim kupcima.

Usmjerenost na kvalitetu i izvrsnost, optimizam i dinamika su samo dio Wurth-ove korporativne kulture.

Trenutno Wurth zapošljava 160 uposlenika, koji se stalno usavršavaju i nude trajnu podršku partnerima u smislu pouzdanosti, profesionalnosti i stručnosti. U Wurth-u, kao internacionalnoj grupi otvorene kulture, smatraju da bogatstvo dolazi od raznolikosti, da individualne razlike i specifičnosti ne predstavljaju zapreku, upravo suprotno: one su ogroman potencijal napretka, te smatraju da kompanija ima tendenciju daljeg širenja i nadaju se da će i dalje nastaviti uspješno poslovati.



AFTERCARE POSJETA FIRMI SOFTHOUSE BALKANS DOO SARAJEVO

U cilju implementacije Aftercare programa - programa postinvesticione podrške investitorima u BiH, predstavnici Agencije za promociju stranih investicija (FIPA), predstavnici Ministarstva privrede Kantona Sarajevo i Općine Novi Grad, posjetili su kompaniju Softhouse Balkans doo i razmijenili informacije važne za poslovanje ove Kompanije.

Kompanija Softhouse Balkans doo je osnovna od strane matične firme iz Švedske (2014. godine), te zapošljava mlad i stručan kadar u IT sektoru, koji postaje sve više prepoznat kao sektor koji daje veliki doprinos bh. ekonomiji. Također, velik doprinos osnivanju ove uspješne kompanije dali su i pojedinci iz bh.dijaspore u Švedskoj.

Predstavnici firme Softhouse doo govorili su o trenutnoj situaciji u vezi sa poslovanjem, kao i o mogućnostima za unapređenje i razvoj, oblastima u kojima posluju kao i o doprinosu koji daju i mogu dati i lokalnoj zajednici, kada je riječ o digitalizaciji.

Firma uspješno posluje, poštujući sve propise, s tim u vezi bilo koji oblik (otvoreno pitanje) nelojalne konkurencije organi državne vlasti trebaju rješavati, što hitnije - kako razvijajući finansijsku pismenost kod stanovništva tako i djelovanjem organa koji su zaduženi za suzbijanje nelojalne konkurencije.

Ono što je najvažnije, firma se i dalje planira razvijati i rasti te zapošljavati nove stručne kadrove.

Buroj

International Group

POSJETA FIRMI BUROJ INTERNATIONAL GROUP D.O.O SARAJEVO

U okviru Saradničke mreže, kao dijela programa postinvesticione podrške investitorima u BiH, predstavnici Agencije za promociju stranih investicija (FIPA), predstavnici Ministarstva privrede Kantona Sarajevo i Općine Ilidža, posjetili su kompaniju Buroj International Group doo Sarajevo i razmijenili iskustva i znanja u vezi sa identifikacijom i rješavanjem otvorenih pitanja investitora radi poticanja rasta i razvoja kompanija u BiH.

Predstavnici kompanije govorili su o trenutnoj situaciji u vezi sa poslovanjem, kao i o mogućnostima za unapređenje i razvoj, oblastima u kojima posluju i doprinosa koji daju ekonomiji BiH i drugim pitanjima.

Buroj Int group doo je kompanija koja posluje u sektoru nekretnina, turizma i usluga (od 2015)., te planiraju u punom kapacitetu zaposliti nekoliko hiljada radnika (broj od 100 radnika planiran je već pri početku sljedeće godine tj. početkom Januara, s nadom da ce se do kraja godine utrostručiti, a ukupan kapacitet je znatno veći, posebno nakon izrade projekta gdje se radi o velikom broju uposlenih). U toku svog petogodišnjeg poslovanja susretali su se sa mnogo otvorenih pitanja, koja su značajno usporila realizaciju projekata, ali su na pragu rješavanja istih. Podrška institucija vlasti svih nivoa treba biti veća u realizaciji ovako značajnih investicija. Projekat provode zajedno sa općinom Trnovo, kao javnim partnerom.

Realizacijom svih projekata, investicija vrijedna milijarde konvertibilnih maraka bi dala veliki doprinos ukupnoj bh. ekonomiji.

Također, važno je napomenuti da se sastanci sa investitorima u BiH odvijaju u okviru Saradničke mreže, mreže institucija na svim nivoima vlasti u BiH, koje su usmjerene na saradnju i rješavanje otvorenih pitanja investitora. Tehničku podršku projektu pruža Međunarodna finansijska korporacija, Grupacija Svjetske banke u saradnji sa Ambasadom Velike Britanije u BiH, putem Projekta privlačenja investicija i unapređenja poslovnog okruženja.



DIREKTOR FIPA-E MILICA MARKOVIĆ RAZGOVARALA S OTPRAVNIKOM POSLOVA AMBASADE LIBIJE U BiH

-OBNOVA PRIVREDNE SARADNJE I POVEZIVANJE POSLOVNIH LJUDI

Direktor Agencije za unapređenje stranih investicija u BiH (FIPA) Milica Marković i otpravnik poslova Ambasade Države Libije u Bosni i Hercegovini Al Motasem Bellah Dhawi razgovarali su o poslovnim susretima planiranim do kraja godine i ponovnom uspostavljanju i jačanju investicijske i privredne saradnje Bosne i Hercegovine i Libije.

Planirana je posjeta i održavanje sastanaka direktorice FIPA-e s predsjednikom Privredne komore Libije i delegacijom biznismena, kao i sastanak sa generalnim direktorom Državne agencije Libije za investiranje u inostranstvu. Navedena državna agencija djeluje kao razvojni fond Libije koji investira u atraktivne projekte u inostranstvu. Najveći broj projekata do sada su realizirali na Malti, Italiji, zemljama Afrike i Bliskom Istoku. Cilj njihovog skorog dolaska u FIPA-u je istraživanje mogućnosti ulaganja u Bosnu i Hercegovinu.

S tim u vezi direktorica Marković je upoznala predstavnike Ambasade Libije o prednostima Bosne i Hercegovine za ulaganje. Marković je istakla da je energetska sektor jedan od najsnažnijih privrednih sektora Bosne i Hercegovine s dugom tradicijom i ogromnim potencijalima i mogućnostima za daljnji razvoj i ulaganja.

Hidro potencijal u BiH iznosi 6 000 MW i koristi se u visini od samo 36%.

Bosna i Hercegovina posjeduje prirodne resurse i uslove koji stvaraju vrhunski ambijent za poljoprivrednu proizvodnju, uključujući raspoloživost radne snage, zemljišta i drugih prirodnih resursa, kao i pogodnu klimu. Ogromni poljoprivredni potencijali samo su djelimično iskorišteni unatoč značajnim ljudskim i prirodnim resursima. Turizam je, zanemarujući period pandemije, u snažnom razvoju i nudi obilje mogućnosti za ulaganja u zimskom i planinskom turizmu, eko -turizmu, kulturom i vjerskom turizmu, zatim zdravstvenom i spa turizmu, kao i morskome i avanturističkom.

U BiH snažan rast bilježi i sektor auto-dijelova, metalo-prerađivački i drvni sektor, kao i IT sektor.

Libija ima teške ekonomske posljedice zbog revolucije i rata 2011., ali i dalje je zemlja koja ostvaruje značajne prihode od prodaje nafte i zemlja s velikim ekonomskim potencijalom. Stoga postoje značajne mogućnosti za obnovu privredne saradnje na području ulaganja i jačanja izvoza.

Upravo i najavljeni sastanak sa libijskom državnom agencijom za ulaganja će predstavljati dobar osnov za nova ulaganja i realizaciju projekata koje će FIPA predstaviti tokom sastanka, planiranog sredinom decembra tekuće godine.



FIPA POSLOVNE VIJESTI ≡

≡ ADRIATIC METALS PLC DOBIO RJEŠENJE ZA EKSPLOATACIJU RUDE U VAREŠU

Vlada Federacije BiH uručila je rješenje za površinsku eksploataciju i preradu olova, cinka i barita generalnom direktoru kompanije Adriatic Metals PLC Paulu Croninu i izvršnom direktoru kompanije Eastern Mining d.o.o. Adnanu Teletoviću.

Cronin je zahvalio na uručanju rješenja za koje smatra da predstavlja važnu prekretnicu, ne samo za njihovu kompaniju, već i za rudarstvo u BiH.

Istakao je da su za manje od dvije godine sačinili detaljne planove o istraživanju, okolišu i eksploataciji, kao i pogon koji će stvoriti značajan projekt u Varešu od kojeg će svi imati koristi.

Teletović je kazao da su njihova istraživanja pokazala da se radi o kvalitetnom rudnom tijelu koje je ekonomski isplativo i da će se uložena sredstva vratiti, a dioničarima donijeti i dobit.

≡ NJEMAČKA KOMPANIJA INVESTIRA U GORAŽDE, POSAO ZA 150 RADNIKA

Njemačka kompanija TVC odlučila je investirati na području Goražda gdje planira proizvodnju medicinskih kreveta i funkcionalnog namještaja. Za početak je već uposlila 15 radnika, a proširenjem proizvodnje i izgradnjom vlastite fabrike na lokalitetu Industrijske zone u Vitkovićima do kraja godine planira zapošljavanje oko 150 radnika.

Ova kompanija posluje u iznajmljenom objektu u Goraždu gdje je trenutno u procesu proizvodnje uposlono 15 radnika, a kako je najavljeno, izgradnjom nove hale na lokalitetu u Vitkovićima, koja bi trebala biti okončana do kraja ove godine, planirano je zapošljavanje oko 150 radnika.

≡ TURSKI INVESTITOR U ŽIVINICAMA ŽELI GRADITI FABRIKU NAMJENSKE INDUSTRIJE OD 70 MILIONA KM

Na sastanku gradonačelnika Živinica Samira Kamenjakovića s predstavnicima firme "Ateşçi" iz Republike Turske, i predstavnicima Vlade Federacije Bosne i Hercegovine je razgovarano o izgradnji fabrike za namjensku industriju na području Živinica za čiju realizaciju je Turska firma "Ateşçi" izdvojila sredstva u vrijednosti oko 70 miliona konvertibilnih maraka.

Formirani su timovi Vlade FBiH, Grada Živinice, te investitora iz Turske koji će odmah krenuti sa pripremnim administrativnim radovima i projektom dokumentacijom potrebnom za realizaciju projekta.

≡ INVESTICIJE U DOBA PANDEMIJE: 50% KOMPANIJA NASTAVILO PLANIRANA ULAGANJA U BIH

Tokom 2020. godine Agencija za unapređenje stranih investicija BiH (FIPA) je realizovala Aftercare online upitnik sa postojećim investitorima i dobila informaciju na osnovu koje 50% stranih investitora potvrđuje nastavak planiranih ulaganja u BiH koje su dogovorene i prije pandemije, 40% će najvjerovatnije odgoditi planirana ulaganja, dvije firme planiraju premještaj dijela poslovnih aktivnosti izvan BiH, a jedna će potpuno zaustaviti investicijske aktivnosti.

U kontaktu sa kompanijama prevladava opredjeljenje kako će određeni investicijski planovi biti na neko vrijeme odgođeni ili usporeni kako bi se nadomjestili izvjesni gubici i prevazišao dodatni rizik i neizvjesnost poslovanja. Pandemijom su osim kompanije koje su vezane za uslužni sektor, najviše pogođeni određeni proizvođači i izvoznici. U stanju globalnog zatvaranja granica, mnoge kompanije su morale smanjiti ili u potpunosti obustaviti proizvodnju zbog nemogućnosti ili otežane nabavke odnosno uvoza repromaterijala. Iz istih razloga, pogođene su i kompanije čije je poslovanje većinski usmjereno na izvoz.

Prema procjenama i objavama relevantnih međunarodnih organizacija, direktne strane investicije bi u narednom periodu 2020/2021. mogle imati pad do 40% na globalnom nivou, što će svakako imati negativan uticaj i na priliv direktnih stranih investicija u BiH.

Prema zvaničnim podacima CBBH direktna strana ulaganja u Bosni i Hercegovini su u 2019. godini iznosila 699 miliona KM ili 357 miliona eura.

Zemlje koje su u Bosnu i Hercegovinu u 2019. godini najviše investirale su Rusija (211 miliona KM) i Hrvatska (117 miliona KM). Iste zemlje su bile i najveći investitori u 2018. godini. Zemlje koje slijede su registrovale značajnija povećanja kapitala u 2019. godini (preko 20 miliona KM): Velika Britanija (85 miliona KM), Austrija (61 milion KM), Luksemburg (28), Saudijska Arabija (22) i Slovenija (20 miliona KM).

≡ PRIVREMENO SMANJENJE CARINSKIH STOPA KOD UVOZA REPROMATERIJALA

Vijeće ministara Bosne i Hercegovine je, na prijedlog Ministarstva vanjske trgovine i ekonomskih odnosa BiH, donijelo Odluku o privremenoj suspenziji i privremenom smanjenju carinskih stopa kod uvoza određenih roba do 31. decembra 2021. godine.

Odlukom su obuhvaćene 64 tarifne oznake i riječ je o privremenoj mjeri u skladu sa Zakonom o carinskoj tarifi.

Robe koje su obuhvaćene ovom odlukom su materijali i sirovine koji se smatraju repromaterijalom, jer ih koriste bh. proizvođači u vlastitoj proizvodnji, za izradu gotovih proizvoda, u proizvodnji proizvoda za izvoz ili su supstitucija uvoznih proizvoda, a koji se ne mogu nabaviti na domaćem tržištu u količinama i kvalitetu potrebnom za proizvodnju gotovih proizvoda.



MISIJA FIPA-E

Agencija za unapređenje stranih investicija Bosne i Hercegovine je agencija koju je osnovalo Vijeće ministara Bosne i Hercegovine, a čija je osnovna zadaća :

- Privlačenje i povećanje priliva stranih investicija u Bosnu i Hercegovinu i poticanje postojećih investitora u zemlji na dalja ulaganja i širenje poslovanja
- Poboljšanje saradnje između privatnog i javnog sektora, predlaganje mjera za unapređenje okruženja za investiranje, a s time i ekonomskog razvoja
- Predstavljanje Bosne i Hercegovine kao zemlje poželjne za strane investitore



USLUGE FIPA-E

Vijeće ministara Bosne i Hercegovine je zadužilo Agenciju za unapređenje stranih investicija da pruži podršku direktnim stranim investicijama i da olakša priliv stranih ulaganja u našoj zemlji. Agencija saraduje s institucijama vlasti i investitorima, te pomaže nadležnim vlastima da poboljšaju zakonski okvir za strana ulaganja. FIPA takođe pomaže investitorima da uspostave kontakte s javnim i privatnim sektorima BiH. Pokazatelji koji se odnose na priliv investicija, uspostava kontakata i studije privrednih sektora koje su izradili FIPA stručnjaci i nezavisni konsultanti, omogućavaju da investitori budu u potpunosti informirani o investicijskim mogućnostima koje Bosna i Hercegovina trenutno nudi. Osim toga, FIPA usko saraduje i sa ambasadama i diplomatskim predstavništvima Bosne i Hercegovine, koji takođe mogu pomoći investitorima da istraže mogućnosti ulaganja u našoj zemlji.

FIPA pruža informacije, analize i savjete potencijalnim investitorima o poslovnom i investicijskom okruženju, uključujući:

- zakonodavstvo koje se odnosi na direktna strana ulaganja
- podsticaje koji se odnose na ulaganja
- ekonomska i poslovna kretanja u zemlji

FIPA identifikira i predstavlja postojeće bh. mogućnosti za strana ulaganja :

- investicijske projekte u fazi razvoja ili projekte koji su već spremni za realizaciju
- preduzeća u procesu privatizacije
- domaće firme koje traže stranog poslovnog partnera

FIPA pruža pomoć potencijalnim investitorima i onima koji su već investirali u zemlji kroz :

- saradnju s javnim i privatnim sektorom
- saradnju s vladinim i nevladinim institucijama kako bi se olakšao privredni razvoj
- saradnju s lokalnim, regionalnim i međunarodnim organizacijama kako bi se poboljšalo okruženje za ulaganja



DA BISTE SAZNALI VIŠE O USLUGAMA FIPA-E, KOJE SU BESPLATNE, KONTAKTIRAJTE NAS DIREKTNO.

Dubrovačka 6.
71000 Sarajevo
Tel: +387 22 278 080
Fax: + 387 33 278 081
e-mail : fipa@fipa.gov.ba
www.fipa.gov.ba

Ured FIPA-e Mostar
Kneza Višeslava, Office 54.
88000 Mostar
Tel/Fax: +387 36 558 815
E-mail: mostar@fipa.gov.ba

Ured FIPA-e Banja Luka
Jovana Surutke 13/III
78000 Banja Luka
Tel/Fax: + 387 51 226 180
E-mail: banjaluka@fipa.gov.ba

www.fipa.gov.ba

Pratite nas na Facebook, YouTube, LinkedIn, Twitter

A map of Europe with white outlines of countries on a blue background. The country of Bosnia and Herzegovina is highlighted with a yellow and blue flag featuring white stars. The text is centered over the map.

INVEST IN BOSNIA AND HERZEGOVINA YOUR NEW OPPORTUNITY

WWW.FIPA.GOV.BA